

陵水縣志卷之六

人物志

列傳

孝友

儒林

列女

漢武帝詔曰十室之邑必有忠信三人並行厥有我師陵邑廣袤三四百里其中峯峰順湖聳峙潏洄感造物之精英稟天地一正氣豈可一格拘哉其有光史冊者尚已至孝子悌弟生人之大節儒林逸士潛德之幽光列女者包括淑行非以節目論也名宦者詳紀德政不以資格限也作人物志

陵水縣志

卷之六

一

列傳

明

廖紀宏治庚戌進士官吏部尚書入祀鄉賢

孝友

明朝

曾允俊亮一畝人增貢生天性純和一門雍穆

章品誼士林之宗十戰棘闈三薦不售

施建造祠字乾隆元年舉孝廉方正載在

卒年六十有八子書開建縣教諭易



林春榮醇厚和藹事父母在左右無方自少至老不  
離膝下侍養必先嘗夜行必持燭先導凡有餽  
遺必稟命一言一行不忘父母待族戚無舛望  
者乾隆十七年舉孝子學使程巖嘗曰賢才不  
擇地而生誰謂培塿無松柏耶

儒林

國朝

張天璇優貢生二歲失怙十齡失恃伯父宗聖撫  
之教養備至璇每屆父母諱日及伏臘令節輒

陵水縣志

卷之六

二

涕泣不自禁其學一準於古性敏慧博極羣書  
爲文翻水而成居雖近市而志遠大取與不苟  
足不出門戶終身不識公門所在人高其品年  
十九試皆冠軍即食餼年二十二學使王安國  
舉優行入國子監肄業名噪京師都人士皆願  
與納交期滿歸年二十六矢志績學無他嗜好  
因遷葬父母得勞瘁二十七歲卒家徒壁立遺  
妻徐氏一子煥勲方數月中夜吞聲與呱呱相  
答邑人莫不含酸茹嘆冢宰王安國自京聞之



製文付後貢生黃道高代祭其靈有人琴之動  
焉徐氏撫孤煥黝能承父業年二十而婚人以  
爲天璇未竟之志將繼於煥黝也乃婚一年而  
又卒媳陳氏依姑守志荼苦一心徐年逾六十  
陳年四十一半月間相繼而亡邑人傷之以其  
無後尤多悲悼焉

黃日蓉字丕熙居邑之萬總坡少聰穎十八爲弟  
子員與兄賜位勗志有成屢赴棘闈薦不得售  
以歲進士終年六十四爲人敦厚周慎力學不

陵水縣志

卷之六

三

倦足跡不履城市惟以一經教子孫周急甦困  
扶危解紛鄰里咸感其德知縣高揚劉以禮先  
後獎其閭子鶴鳴入太學鶴飛庠生孫際昌廩  
貢生際隆恩貢生

劉旋寧閩中縣知縣明達之祖歲貢生紹紳之曾  
祖由國學生捐職縣丞治家嚴肅一以祖訓教  
子孫待族戚和而厚好施與樂行善事不倦邑  
人誦其德故詩書之澤劉氏爲盛焉

葉元圭字信侯居邑之桃油先世白茶山遷良平



曾祖梅長公以明經通判潮州叔祖三槐公爲崖州明威將軍父振明隨之崖過陵水嘉山川之清美遂家焉振明耿介誠篤力學敦品舉鄉飲賓元圭少敏慧嗜經史能文且善書士林師之弱冠補弟子員食餼屢薦不售爲歲貢生同人勸之仕進不樂也言行恪守父訓遠近受業者以百數知縣冷岐暉蔡書紳先後延課其子凡四載未嘗一言及於公事其介節如此年八十卒子崧凝崧源勤學能嗣其業五代同居分

人倫之樂事焉

馬德輝字捷明下河處士庠生國楨次子恩貢德馨之弟附貢德懿之兄天資過人才情敏達爲文不落恒蹊高尚其志不求聞達爲人謹言慎行又非曠達一流遷居普留村善待族戚鄉里人皆服其厚道年八十二卒閭中稱爲碩德耆年

王瑄字玉斯明庠生良謨之子世居安馬膺歲薦選任廣寧司訓性明敏通經史工詩賦文行兼



優從學諸生多所成就亮一箇蛋人例不與考  
有黃開秀能文瑄保送入試得入學遂登歲薦  
自是人文蔚起至今不替瑄之力也時縣中公  
事繁數一切皆待瑄諮議胥協於理與長吏學  
博往來每以詩歌相贈和康熙戊子年六十有  
一知縣李聘暨紳耆製錦稱觴年七十三卒子  
文林郡庠生孫道廩生曾孫克恭庠生克信廩  
貢生元孫大文庠生明文歲貢生時榮從九品  
子姓繁衍世守儒業

水縣志

卷之六

五

黃龍見庠生作翰之父也少失怙恃家無餘儲龍  
見不爲所累發憤勵學至老不怠年七十八卒  
夏尚傑國學生居白米壩生有異質年弱冠而行  
誼卓然知縣張暉以上苑儲英期之惜年不永  
二十四歲死遺妻汪氏子一未晬寡妻孤子一  
室整齊鄉人有賢母孝嗣之目

胡富海歲貢生世居安馬性稟聰穎俊偉不羣文  
行兼優康熙十二年兵備道王廷伊太守牛天  
宿知縣崔 並以額後獎之未仕卒孫奇濤



庠生曾孫光翰監生元孫高鳴高魁庠生

胡世璉字尚友爲人循理樂善平鄉中曲直無一  
偏陂收瘞露骸必慎倡建書室延師教讀生徒  
成就者指不勝屈年六十一卒子學孔郡庠生  
孫紹宏曾孫高朴俱邑庠生

王良蘊庠生仁厚試樸善處鄉族年九十八神明  
矍鑠孫其昌庠生曾孫魯熊庠生

曾書字特五居邑之亮一苗父允俊貢生舉孝廉  
方正書方總角時性穎悟延名師以教之書亦

陵水縣志

卷之六

六

勤懇勵學文日以進乾隆辛酉科拔貢應

廷試肄業太學大司成孫嘉沅器之試輒冠軍數奇

棘闈屢薦不售歸建清源亭教授其中生徒甚  
衆皆試列前茅其爲教先敦倫次及經義掌教  
順湖書院凡八年任開建縣教諭勤課諸生獎  
勤行誼學使翁方綱郡守戴汝槐將薦之以病  
乞歸子日景乙酉選貢中式戊子京兆試克

咸安宮教習任保定縣知縣日仰稟生長孫明曦  
貢生咸承家學克世其業



鄭其仁字永壽居多華里以歲貢授廣州府司訓  
性淳厚敦倫紀父母兄弟無間言常處清華堂  
設教生徒數十百人試輒冠軍尤喜施予建橋  
修路率先倡焉廣州爲嶺南首郡文武生千餘  
人訓迪有方俸滿謝病歸仍授徒清華堂中六  
十六歲卒子必蔚能讀父書補邑諸生

劉明達字文齋早慧善屬文以選貢肄業太學考  
職授陝西長安丞上司器其材試署大荔中  
縣稱職薦升四川閬中令淡於仕進引病歸優

陵水縣志

卷之六

七

游里舍溫雅勁直人嘆其有古鄉先生風焉

李天榮字國英世爲嘉應仕族自其祖以武舉任

萬陵城守盡室之陵天榮善繼祖若父之志卜

居陵之北門外置田產建祖祠以收族睦媿恤

黨隣里稱篤行君子邑令重其品非公不至有

子羽之風焉

陳任重家貧苦學品誼端方與兄任選均有聲膠  
庠義方教子皆能繼其書香年六十有九卒

列女



明

王氏百戶王世恩女生員譚以謨妻年二十夫死  
飲水茹藥矢志靡他教子道淵母兼父職道淵  
入邑庠未幾卒氏撫孫正教之亦如教道淵正  
入邑庠未幾又卒氏仰天大哭墜以當門勉強  
自持撫弱曾孫於襁褓之中年八十餘舉節孝  
旌表祀祠

萬氏千戶萬人傑女百戶王國彥妻年十九而寡  
無子擇族人之應襲者撫養為子年六十四卒

陵水縣志

卷之六

八

閨門嚴肅巾幗之師舉節孝

旌表祀祠

王氏監生秦廷試妻廉州府教授王真女夫寃遭  
誣陷死於非命誓不欲生捐軀赴難事聞於上

旌表貞烈祀節孝祠

陳氏生員陳兆鼎之妹年十六適王造龍踰年夫  
死氏殯殮甫畢即投繯此崇正年事至我

朝康熙戊辰攝縣事同知潘廷侯為文以祭且表其

門



國朝

陳氏邑民顏德脩妻年十八歸德脩未及三載而德脩歿氏方有娠承姑命飲泣苟活曰女未可知男也則顏氏有後矣閱數月生男學禮氏矢志撫孤教以少儀學禮十五歲而殤乃嗣姪復禮爲後鞠育有成奉姑就養無方姑嘗病醫之不效人謂瘞以山猪肚可痊氏徧求不獲一日樵於山有山猪負箭蹶氏前招樵女携歸取肚奉姑病即瘳族人憐其貧與之祖祠田二畝每

陵水縣志

卷之六

九

歲必倍獲邑人號其田曰孝婦田伶仃孤苦歷四十八年乾隆庚寅舉節孝

旌表其門

羅氏邑庠生曾脩一妻萬州庠生羅憲章女黎寇擾亂劫掠居民氏有一子負之而逃中途遇賊摔其髮至柳園欲污之不從擲子於地抱柳樹罵不絕口賊怒剖其腹而死詳萬州志及府志陳氏林天福妻由文昌遷陵邑氏抱性煬和與人無忤色年百有一歲邑人以貞壽舉因里隣不



嫺成例結未脩申上駁飭又距省二千餘里事  
遂寢縣令張暉特表其門氏持家嚴肅羣奉爲  
師教子孫一稟先訓時推重焉卒後郡司馬田  
宏祚爲文以祭式女宗也子春榮見孝友孫騰  
霄騰漢見選舉曾孫六人毓鳳邑庠生一門友  
恭姪姓皆彬彬成國器厚德之載福長矣

鄧氏萬文燦妻年十八適萬事翁姑盡禮待姻親  
以和睦二十四歲夫死遺子振先氏矢志守節  
撫振先以養以教一以承先啟後爲已任迨振

陵水縣志

卷之六

十

先早卒又撫弱孫年芳入貢選年芳卒又撫曾  
孫元聖入成均氏一生艱苦三世賴以成立家  
聲不墜奇男子不是過也年九十有八例得請  
旌以海南地遠竟未舉行鄉老皆式其門

邱貞女普留村人庠生齊岳之女處士京泰之姊  
貞潔性成幽閒獨處年十四父母許字杜生未  
婚而杜夭未幾父母繼逝女終日危顏絕口不  
談人間事族戚敬畏之無敢言醜事者數十年  
與弟京泰食貧京泰亦事姊甚謹與言聖賢小



佛以成其志年六十四卒卒前之十餘年於例  
即得請

旌以陵居海外遂弗舉行潛德之湮沒而不彰者何  
可勝道嗚呼豈獨邱貞女一人哉

歐氏劉璋妻年十七歸劉十九生子紹紳未晬而  
夫死氏仰天泣血痛夫子年少通材賁志而不  
得有成遂以子職自誓事姑曲盡婦道數十年  
無一毫拂姑意者且撫孤襁褓之中六歲遣就  
外傳篝燈教讀勉成夫子之緒紹紳遊泮使渡

陵水縣志

卷之六

士

海負笈端州從學人師旋食餼成歲進士凡二  
十餘年氏荼苦自甘一如其初貞女詩有云妾  
辟纊兒讀書坐房夜夜聞啼烏兒能成名母不  
嫁良人瞑目黃泉下氏之謂矣年八十有四守  
節六十五年學使吳鴻顏其門

葉氏馬村人歲貢生元圭長女庠生崧源姊年十  
八適陳達一生男故爵甫四月而陳逝氏年二  
十廿貧勵志教遺孤不殊嚴父年八十七卒於  
例得



旌而未舉也

曾貞女許字王熙歲貢生殿颺之孫庠生王崙之子熙十七而殤氏聞言辭父母兄弟至熙家披麻哭泣盡禮蓋哀聞者心酸而貞女守志自安終身素服不事鉛華年六十一歲卒其守貞例得上請事缺未舉遂與邱女同慨矣

陳氏庠生王光牙妻年二十一牙死遺子二氏痛夫亡子幼泣持門戶苦節自甘教養二子俾各成立守節六十餘年牙熙弟也陳曾妯娌也

陵水縣志

卷之六

三

一門貞節真有光哉

蔡氏普留人處士翁奮颺妻貢生其修之從叔母也年二十二生子兆祥將晬夫逝上事舅姑先意承志下撫幼子慈而兼嚴治家清肅終日不聞咳嗽聲年七十八卒

武氏普留人處士商朋龍妻年十八歸商家貧性貞介奉舅姑盡婦道無間族黨皆以孝稱年二十四夫死撫遺孤白璉甫數月鞠育倍至教以義方年八十九卒



張氏馬瑞圖妻年二十五喪夫守節教養嗣子德  
懿成歲貢生學使吳鴻式其廬年八十八卒  
萬氏葉元圭妻歲貢生帝璽之姑幼嫻內則能盡  
姆儀前有戒旦之風後有蠶荻之訓崧源其子  
也潛膏其孫也前後入庠序皆有聲年八十七  
卒

鄒氏監生吳夢龍妻事舅姑盡禮以孝稱舅姑亡  
後夫弟夢蛟爭產氏力勸夢龍讓之夢蛟感而  
益睦年二十夫亡苦節自守撫子學士爲選貢

陵水縣志

卷之六

三

學士卒無嗣氏擇繼琮燃生孫兆鳳督之力學  
相繼遊庠年八十六卒

鄒氏廩生王道妻早年失所天遺三子茹荼食蓼  
撫其子而教之長克恭遊泮季克信食餼貢太  
學氏疏布勸耕績克恭等浼隣婦勸之少休氏  
泣曰吾育諸子有成辛苦素所甘况天不薄我  
而使子能養我敢自逸以貪天之福乎嗣諸孫  
大文明文並入庠明文以食餼成歲貢生時榮  
從九品皆氏之教也年六十卒



吳氏邑庠生曾允文妻增貢生孝廉方正允俊之胞弟婦也年十八于歸二年生子冕甫及啐而夫逝氏痛不欲生者數四舅姑諭之得免自是矢志孀守苦節自甘氏性賢明奉事舅姑必誠必敬族黨皆以孝稱教遺孤不殊嚴父冕自幼多病讀書未遂氏願嗣又以教子者教孫皆有可造年七十有二而卒守節五十一年闔邑紳士以節孝呈學使翁方綱顏其門

曾氏監生廖衍祖之母性明敏曾讀書年二十五

適廖事舅姑盡孝逾三年而寡遺子衍祖氏上事舅姑下撫幼子衍祖入成均先卒氏又教諸孫苦讀長孫振文遊泮旋食餼同學以節孝呈明學使史夢琦因顏其門年八十一卒

曾氏增貢生孝廉方正允俊之女年十九適監生陳績宗爲妻逾二年夫逝生子甫四月氏仰天泣曰氏當從夫死念上有二老下有遺孤姑且作未亡人耳事舅姑先意承志及舅姑亡喪葬盡禮教子堯典遂入庠守節三十年母子相繼



淪亡悲哉知縣喻實忠式其廬

名宦

明

姚履素萬歷間副文入祀名宦事詳平黎

袁達福建閩縣人成化間知縣事入祀名宦事

實失傳

莫汝俊馬平人嘉靖間知縣事平易近人廉靜不

擾修廢舉隆惠愛士民去任時百姓攀轅遮道

吳道亨江西浮梁人明萬歷十六年知縣事見事

陵水縣志

卷之六

十五

精明人不敢欺訓練鄉勇多方指授民賴以安

汪宣南山所千戶性至孝讀書好禮氣度冲和

督理屯田均畝輕賦困丁以甦更立社學養重

丁之俊秀者一時多所成就嘉靖四十五年海

寇何喬犯境宣修城浚池爲守禦計臨陣推牛

饗士挺身出敵賊攻城急宣射之殲其執螯弧

者賊遂遁在任二十餘年軍民德之

范維垣四川人骨懷磊落長於文詞愛士恤民文

從寬簡地方利弊侃侃直陳治陵九載海無告



警黎收悅服捐修解宇城池一切必親往巡功  
其勤勞非他人所能及却象後行李半肩而已  
楊六府浙江平湖人剛方清正折獄多平反赤子  
其民恩威互用時黎首兵春違例擅管大營  
務威攝居民謀爲不軌六府密行詳報 德正  
法時撫軍薦於朝曰端品真儒其自書堂聯云  
守伯起家以口知不愧過剛奉故里百折難曰  
何尚賢號芥林順德人恩貢生由江西寧都司訓  
遷縣教諭勤課試獎行能捐俸建習靜軒爲諸

陵水縣志

卷之六

六

生會文所擇文公家禮簡要易行者刻於版又  
著嫁婢勸言陵俗丕變陵士苦於赴科資爲之  
資以筆札給以餼牽士心誠服有海寇伺文武  
吏俱外出率數百人突至城下賢登城拒守士  
民相繼爭先賊不敢薄城賢遂由間道逃萬州  
請兵兵至賊遁諸邑皆遭劫掠陵獨得完賢之  
力也賢質癯弱如不勝衣及見大敵憤不顧身  
其義勇如此遷廣府教授致仕著有芥林集四  
卷行世詳廣州府及順德縣志

